



04913

平浙紀略卷十三

左公自奉



命入浙寇氛充塞遺黎僅存凡大軍克復城邑及所過地方

蒿目淪胥亟籌撫卹無日不接見士民延訪疾苦同治

元年四月二十四日疏言浙省膏腴之壤盡爲賊踞衢

嚴一帶山鄉瘠薄素鮮蓋藏頻年屢遭兵燹小民死喪

流亾田屋荒燬臣軍行所至目覩災民男婦露宿野處

道僅相望有數日不得一食者有一家餓斃數口者近

復疫氣流行十人九病而浙之殘黎幾於靡有孑遺矣

此等飢民何忍任填溝壑日夜思維憂心如擣六月十

平浙紀略

卷十三

一

七日疏言上年賊首李世賢李秀成先後竄浙正值農

民分秧割稻之時舊穀被掠新穀無收不但軍食無從

採辦卽遺黎僅存者率皆飢疲不堪面無人色甚則槁

死破屋之中骸骨縱橫無人收殮疾疫傳染田土荒蕪

皆由於此臣軍行所至目覩此狀無淚可揮經過開化

馬金遂安西安等處皆勻撥錢米交地方官紳酌量分

給聊緩災民旦夕之死過後則又不知作何景象矣後

又疏言浙江一省自賊竄擾以來郡縣城池之僅存者

惟定海石浦龍泉慶元泰順而衢州一城以外均徧遭

蹂躪溫州則先被會匪入城繼被賊肆擾鄉村幾無完

土統計被禍之烈實爲各省所無左公於此恤恤乎三
致意焉蓋浙江雖擅絲茶魚鹽之利產米素少嘉湖甯
紹號爲膏沃而地濱江海水患洊至杭州九屬澤國居
半金衢嚴溫處台各郡山多水少或海溢蛟發則苦潦
恆暘兼旬則苦旱蠲征緩賦殆無虛年當承平無事物
力豐盛時歲輸漕三四十萬至五六十萬石而江蘇湖
廣之米至於海甯所屬之長安壩以濟浙西謂之米市
臺灣海島之米至於甯台各口以贍浙東民皆仰以爲
食浙之西境有時或取給於江西至省垣則米尤騰貴
較之數十里外價輒贏千錢有奇富室菽米不入城郭

平浙紀略

卷十三

二

常平義倉俱無積蓄咸豐十一年杭州再陷雖力盡援
絕亦由掘鼠煮弦無食以爲守故也賊至之區如梳如
篦鋒鏑餘生皆爲餓殍昔之洛下邱墟關中喪亂郎吏
餒於牆壁氓庶填乎溝壑其慘酷豈有過於此哉維時
衢州解圍城外米穀爲賊擄括悉聚大室士民之賢而
愿者多輸助軍食或據非已有因而興訟其無主者官
爲封運入城安越軍初攻龍游民分糧助軍若恐不及
迨後賊益蔓延惡民之饗官軍也焚殺特甚又久踞龍
游日肆掠村鎮閒於是十室九毀閒有斷瓦頽垣病呻
其中者率無升斗之需隕然待死而已左公旣數獲大

捷電埽三衢廓清開遂進軍分圍龍游湯溪至元年冬
閒通檄已復各屬曰浙江頻年遭賊擾亂幾無完土兵
燹之後疾疫流行哀我殘黎何以堪此本部院受任於
傾覆之餘德薄能淺用兵遲鈍致士民久嬰困阨上負
九重特達之知下虛兩浙來蘇之望日夜思維罔知攸濟是
用條列十二事府縣其各設一局名曰同善擇廉幹紳
士董之並聽其分局鄉村應辦事宜四條一收養幼孩
遇有被難幼孩自數歲以至十五歲者卽收入局立冊
註明姓名年歲籍貫居阨父母伯叔兄弟姊妹存亾及
有無宗族親戚每口日給米半飭鹽菜錢八文兩人共

絮被一牀如有親族來領須經幼孩自行認明方准給
領以防冒詐有拐賣者事發斬首或鋪戶願領出學習
手藝取具領字黏卷備案姿性穎異者送入義學讀書
日後長大聽其歸家其有無家可歸無親屬可依本地
人民願收畱作養子者按照道光年間兩江奏准成案
由官給與執照作爲嗣子收入族譜宗族不得以異姓
阻撓一收養婦女凡遇被難婦女問明年歲籍貫居址
翁姑丈夫父母伯叔兄弟存亾及有無內外親屬詳細
註冊由局發棉麻課令紡績織成布疋歸局發售以充
經費十歲以下如無可依歸本地人民願收畱作女作

媿者官給執照爲憑以免異時爭訟其餘與幼孩同一恤養孤寡殘廢城鄉市鎮遇有孤寡殘廢報局施賑並准該地境寫立緣簿沿門乞食一收埋齒骼尸骸暴露慘不忍觀且凶穢薰蒸易成疫癘急宜收埋掩葬凡收埋一尸掘深四尺者給錢二百文每日由局僱人巡視遇有暴露不問親屬有無卽予收埋插立竹標暫爲誌識應籌經費四條一增鹽茶釐稅鹽除官運及零星肩挑負販數在三十觔內不再加征釐稅此外每鹽百觔加釐稅錢五百文茶釐亦然或於場竈征收或於水陸口岸各卡局征收溫處境內總以此爲限專欸提充同

善經費一增船戶釐稅海船出口除所載貨物應征釐稅外每百石增船稅錢四百文江船每石加抽船稅錢四文均於載齊之日收取給票一勸捐祠廟私租凡民間宗族祠堂積存公款以三分之二贍其本族地方廟宇所有田土租息劃提三分之一歸公充作經費一勸捐紳富凡捐錢八十千者給予六品功牌六十千者給予七品功牌四十千者給予八品功牌二十千者給予九品功牌每捐至百名卽由局稟縣造冊轉詳專送本部院行轅立將各等功牌填給其已捐領六品功牌願換捐從九品者准赴行轅換給從九品印收如現有部

照卽發部照或力不能捐貲而設法能全活百人者准
詳明實蹟給予六品功牌各縣官委及局紳辦理妥善
全活最多者分別核請保獎應行嚴禁四條一禁拐擄
亂離之後民閒父母妻子均不相顧其因窮苦難度將
子女妻媳轉鬻與人者原難一概禁止倘匪徒因此販
賣人口乘機拐騙或恃強擄搶法所不容事發立予斬
決一禁擾索賊前踞各縣徧設鄉官其中固有甘心從
賊之人亦有因家族累重脅迫不堪勉受僞職者若一
律查辦無以昭法外之仁所在官司宜苦心分別妥爲
辦理倘書差營兵及地方棍徒藉端嚇詐擾索事發先

科詐索之罪一禁欺凌兵勇殺賊原以安民團練禦暴
非以爲暴敢有恃強恃眾擾害閭閻欺壓良善擅違軍
令者官司訪查得實卽通稟本部院分別治罪如係游
勇立予斬決一禁屠宰耕牛稼穡爲民生之本耕牛乃
農務之要亂後田土多荒牛力缺乏宜禁宰殺以裕耕
稼之用倘有販賣耕牛售與屠戶或自行宰殺事發究
懲以上十二條姑就目前補救事宜而言地方情形各
異習俗亦殊如有應行推廣增減之條稟明核奪所有
各縣辦理經費由官運甌鹽項下每縣先籌發錢二百
千文以爲之倡凡我寮屬士民當此痛定思痛之際咸

宜努力爲善勉圖補救萬一若有藉端斂費肥己或玩視人瘼見義不爲本部院耳目所及亦必分別參究以昭大戒二年二月初四日左公在嚴州營次附奏言浙江目前困敝情形人物彫耗田土荒蕪彌望白骨黃茅炊煙斷絕現屆春耕之期民間農器毀棄殆盡耕牛百無一存穀豆襍糧種籽無從購覓殘黎喘息僅屬者晝則緣伏荒畦廢圃之間擷野菜爲食夜則偃枕積垣破壁之下就土田以眠昔時溫飽之家大半皆成餓殍憂愁至極并其樂生哀死之念而亦無之有骨肉死在側而漠然不動其心者哀我人斯竟至於此臣於去冬

曾籌補救十二條刊發各屬現復籌採買豆穀種籽購求耕牛招集鄰省農民來浙耕墾冀將來或有生聚之望惟浙省被難地方極廣巨富紳民早已避地遠徙捐無可捐臣軍之餉積欠太久日食尙艱雖所過地方每與各統領營官哨弁共圖分食煮粥俵散錢米所獲賊中穀米亦酌量賑糶暫救目前然涓滴之施無裨大局且距新熟之期太遠災民朝不保暮難冀生全查有浙江之富紳楊坊俞斌毛象賢等十數員身擁厚貲坐視邦族奇荒竝無拯卹之意且有乘機賤置產業以自肥者爲富不仁莫此爲甚現令盡力速措巨欸廣購米石

運回辦賑濟卹危而昭仁卹之誼旋奉

上諭浙江此次之變吾民顛沛流離千里赤地朝廷軫念民
瘼哀憫殊深左宗棠現擬散錢煮粥拯救饑民招集流
亾給資耕種具見該撫能體朝廷德意惠我災黎而富
紳楊坊兪斌毛象賢等十數員非但膜視邦族不加拯
卹且欲乘機賤置產業實屬忍心害理爲富不仁著照
左宗棠所擬飭令富紳楊坊等力措巨款廣購米石迅
救卹危如敢不遵卽行嚴辦是時難民來歸者日眾至
於人相食楊昌濬商請左公設以商代賑之法下令收
買銅錫鐵鉛茶葉竝傭婦女揀茶而以米給值以茶濟

平浙紀略

卷十三

七

餉全活甚眾迨三年二月杭州克復三月十三日左公
附奏言臣於三月初二日進駐省垣巡視各城堞身聞
有轟坍之處尙易修葺惟駐防城身概行拆卸房屋但
存牆壁省城以內倉庫衙署俱已蕩然無存街市房屋
亦大半折燬聞無事時省城內外居民共有八十一萬
餘口現除逃亾死故外陸續來歸及存畱遺民合計不
過數萬口一片劫灰傷心慘目蓋兩次淪陷被禍爲尤
酷也現已遴派員紳設立賑撫局收養難民掩埋屍骸
竝招商開市一面將急須修濬工程辦理以期通商惠
工暫救時局左公初入卽傳令申做各軍嚴禁攜帶婦

女搬運器物出城先是在籍道員胡光墉豪於財杭州
初次失陷賊以城內居民力協官軍守陴恣行殺戮輒
反接其手每壘牽數十人而駢斬之伏屍盈地流血成
渠貞婦烈女相率赴水城河爲滿賊退之後貌皆如生
光墉捐貲具櫓或兩人一棺埋之湖上及城之再陷也
光墉先領銀六萬兩往上海湖北購米不及則具海舟
入甌子疊泊錢塘江僻處全濟頗眾泊左公大軍入浙
檄光墉來謁首繳還前領銀六萬兩並輸助軍餉左公
察其可任令經理賑撫局務於是購米爲食訪明被難
婦女家屬所在分別領送修義渡復牛車以便難民渡

江來往牛車者爲水沙而設從前江多沙少幾可直達
西興嗣於東岸漲沙數里每逢潮至沙皆沒水潮退又
阻於泥貧窮婦女無力僱肩輿者蹠躐泥中時有陷蹠
滅頂之患或倩人背負亦多危殆且無以別男女之嫌
自捐設牛車迎送淤泥中而民皆利涉賊擾遂廢至是
復之並收城鄉暴骨數十萬具分葬大家於岳王廟左
里許及淨慈寺右數十武地繚以粉垣而阡表之江干
湖墅則就近掩藏之存歿以安當是時糧儲道楊昌濬
方克武康井舍煙稀雞犬絕聲遺民百不存一所復各
城瘡痍無有過於甚者賊之初起也妄謂堅明約束人

多惑之縱火恣殺所過爲墟復盡擄其餘分男女館母
子夫婦不相見後益肆行淫掠慘酷萬狀破城旬日輒
謬稱安民遍徵城鄉見戶貢獻各設鄉官搜括一次許
以永免錢糧愚民或欣欣然相告以爲從此春租秋稅
不患追呼化日光天得安寢息未幾而賊騎復至擄其
箱篋未幾而賊騎又至括其米穀乃至日用器物尺布
斗粟悉罄所有而過門入室持刀相恫喝者猶日纍纍
不絕卒乃盡刈田圃之禾黍菜蔬以去而民食惟草根
樹皮矣其富而黠者或先避去或後逃亾轉徙江海且
饒裕如故其貧而愚者或在江鄉水村則以小舟載其

家室稍攜餘糧贖物託命於小溪汊港叢蘆密葦之間
朝此夕彼麤魚蝦採菰苳以爲食韜蹤匿跡多所全活
至負山傍嶺習見林巒無舟楫之利溪港之便保抱攜
持厥婦子及其姻鄰晝伏峭岬夜潛深箐遠竄百里近
走數十雖復深山大澤巉削幽邃賊從而弋獵之兒啼
犬吠皆足爲累或以烏槍長矛擊刺林中希得免者是
以浙中喪亂水國被害較輕戶口十或全其五六武康
既素瘠多山又當賊往來皖浙道路之衝故蹂躪至此
楊公惻焉傷之於是進其遺民耆老勸之招徠籍賊餘
糧並籌備米穀而施之賑時蠶桑已過令稍種蔬菜他

處難民婦女一體贍濟旋進軍克復安吉孝豐地方彫殘情形與武康相若平時戶口約二十萬至是縣存數萬人皆爲駐多日極意撫綏而後行民深德之一時論者亦咸以規畫爲至善云先是二年六月奉

上諭浙省疊遭兵燹小民流離失所殊堪軫念自應將該省漕糧量予減免以示公溥之仁著將杭嘉湖三屬稅則各按重輕分成核奏辦理左公旣平浙遂於省城設立清賦局議減三分之一並裁革浮費定爲經制從此吏畏其法民安其業服疇食德永永無極最爲善政之大者又以海塘坍塌潮入浸灌民田事關七郡水利奏令

前按察使段光清於塘身後築土備塘一道高寬各數尺屹然保障繼左公撫浙者蒨澤馬公新貽合肥李公瀚章暨楊公昌濬並盡心講求石工柴壩以次修復均有專案茲不具載他如北新關繫杭州一方民瘼奏請停止劃釐以抵榷稅嘉湖鎗匪爲奸盜之源風俗之害經布政使蔣益澧節次禽斬劇匪百餘編立船埠稽查保甲勒繳器械後又會同江蘇捕治其風遂戢任劉璈爲台州知府以除豪暴整頓瀕海水師以制盜艇濬治西湖南湖州河以便農商建修各祠宇書院以興祀學招集遠方農民以墾荒蕪城中採積米穀至十餘萬石

左公疏內所稱二臣與臣共事多年信心有素於整軍治民之事必能補臣缺漏仰答

恩知者也及報銷軍需詳文有云尤萬不可緩者杭乍駐防兩營官兵壯丁皆已殺賊捐軀婦女亦多從死所存鋒鏑之餘及各屬難民皆無食無衣無所棲止必須酌給錢米蓆片並籌給牛種以延殘息並不能待至辦理善後始行賑撫又白骨徧地道殣相望急須掩埋以示矜憫又云軍行所至地方半成灰燼遺黎鮮有生機皆隨地隨時設法撫卹卽村鄉市鎮閒有賊遺穀米亦均儘數散放以延難民旦夕之喘未任顆粒暴棄惟二年內

平浙紀略

卷十三

十一

克復金華海甯二城三年內克復省城暨石門桐鄉二縣塘鄩一鎮湖州一郡各因賊酋投誠封遺米穀鹽甚多散給貧民之餘委員盤量變價及以穀米抵用尙共得銀三十四萬七千餘兩除海塘經費前出民捐後撥釐金巡撫布政使衙署出於捐廉修建外所有祠廟各著監倉城垣考棚書院以及內外城河各屬堰壩塘渠皆取辦於此不足仍以釐金益之不數年閒流亾漸復田土漸治絃誦漸興闔閭漸盛鋒刃不狎於皮骨烽火不驚於心魂回思賊勢縱橫民生塗炭之時已天地不足喻其否泰矣向微左公援之於前數心濟之於後而

能若是乎易曰弧矢之利以威天下以此毒天下而民從之今師行無秋毫之擾民困有懸之解所謂拔之水火而登於衽席者非邪據其梗概附於兵事之後匪誌異量之恩亦以備列一時之變云爾

平浙紀略

卷十三

三



左公始自奉

命幫辦軍務由長沙募五千餘人訓練兩月率入江西嗣增募三千人江西月議給餉五萬及景德鎮樂平之捷旋駐廣信府持軍嚴整秋毫無犯民安樂之復先後議以景德河口釐捐由左公委員筦收並以浮梁樂平等縣錢糧劃歸兵餉蓋數縣境皆瀕邊向爲賊擾民不得耕穫官不得征斂左公軍至賊怖而東走境土漸安民間錢糧輸供左公軍始肯踴躍完納而釐捐號爲利藪兩處皆巨鎮通衢計一歲收捐不過數千金左公遴員整

平浙紀略

卷十四

一

理遂至倍蓰稍裕軍食而終不敷迨督軍援浙徵兵愈眾需餉愈鉅籌食愈難咸豐十一年十二月左公奏言奉

旨令江西撫臣籌解臣軍餉十萬兩以速師行福建按月籌撥十萬兩同軍火接濟然江西前已欠餉十餘萬一時恐難齊集福建預已諉之江西事同兒戲請

旨敕下部臣查明各省應協濟浙江之欸閩省暨各省應撥解援浙軍餉各欸趕緊運解廣信府交臣後路糧臺以應急需並請發職官花翎藍翎卹照及封典虛銜監生從九執照交湖南江西撫臣遴派所屬籍隸浙江道府

各員勸諭浙江流寓兩省之官紳商幕捐輸兵餉旋奉
廷諭浙省軍情萬緊餉需自不能不寬爲籌備前因薛煥奏
杭城危急曾照王有齡所籌將廣東每月協浙餉銀五
萬兩江西湖南湖北每月協浙餉銀各三萬兩均由上
海預納中外商人貨稅給單執赴各省抵滙浙餉卽由
薛煥收集此項抵餉設法運浙其各省如有海道及他
路可通浙省者均卽各將應協月餉分途解運並將曾
國藩所請福建閩海關撥濟浙江月餉三萬兩諭慶端
等撥解左宗棠軍營廣東粵海關撥解浙江月餉十萬
兩諭勞崇光等或由江西轉解左宗棠軍營或由海道

平浙紀略

卷十四

二

駛運上海由曾國藩轉解左宗棠軍營總期得以迅籌
接濟俾利軍行現在各省協餉斷難得濟滙關釐稅兩
項自有盈餘浙餉緊急本日已諭令薛煥先行酌撥接
濟並著曾國藩查明如有收集前項抵滙浙餉一併催
提以濟急需同治元年正月二十九日奏請於廣信暫
設糧臺以廣信知府鍾世楨總司之設轉運局於玉山
委員會同署玉山知縣章澂經理其事並請調湖南候
補道王加敏及在籍江西候補道胡光墉來營辦理糧
臺四月二十四日奏言臣軍未入浙之前已欠餉六月
有奇僅恃兩江督臣曾國藩所撥景德鎮河口釐金婺

源樂平淨梁三縣錢漕及江西奉

旨協撥一欵陸續彌補欠數尙多人浙以來積欠又二十餘萬兩從前李元度李定太兩軍餉需由閩省酌發雖所欠甚鉅然每月尙各有二萬兩自正月以後閩餉稀至賊氛更緊曾國藩發給衢防李定太一軍銀二萬兩米三千石臣亦發給衢防銀二萬兩又撥給李元度安越軍閩餉銀五萬兩買米銀八千兩米一千三百餘石復擬遣撤十營由臣發給一月口糧銀三萬四千兩以作行資而臣軍之餉又挪空兩月有餘合之舊欠仍六七箇月不等所有奉

平浙紀略

卷十四

三

旨協撥浙江軍餉各省以粵東每月十萬兩爲大宗督臣勞崇光來緘備言支絀情形將來縱微有接濟亦斷難如期如數閩海關協浙之欵從前每月五萬兩近奉

旨每月協撥三萬雖已委解在途卽令按月解到臣以之分給衢防安越兩軍而亦不敷甚鉅此外湖北按月協餉一萬兩僅解過一次湖南按月協餉一萬兩除給劉培元一軍行資及臣軍增募勇丁經費並軍火帳棚等項此時亦無應解之欵總計各省除福建解過五萬兩湖北解過一萬兩外別無解欵現在劉培元蔣益澧及臣調募各軍約五六月間均可陸續到浙每月又須增餉

十三四萬臣軍及備防一軍安越汰存之軍每月共須餉二十四五萬兩卽令各省協餉如數按期源源委解每月亦不過十五萬兩尙有十萬兩虛懸無著而各軍舊欠之餉尙未暇計也至奉

旨諭令薛煥抵滙餉銀已收若干臣與曾國藩距滬甚遠無從查悉薛煥亦並無先行設措接濟仍請

旨飭將各省抵滙浙省餉銀委解曾國藩大營俾臣得就近迎提以資接濟六月十六日奏言臣軍食米水陸運道艱阻所經河路灘高水淺逆流挽運一船數石至十數石而止陸路惟玉山至常山較爲平坦可通小車餘皆

平浙紀略

卷十四

四

攀崖踰嶺頂踵相接每人挑負日不過三四斗行不過數十里勞費不可勝計軍中常恐缺食未能迅赴戎機各省解到協餉甚少江西撫臣沈葆楨及布政使李桓深知臣軍飢困情形於省倉撥米穀二萬石陸續解抵廣信交臣後路糧臺動碾接濟復令江西現在各官捐助浙餉並各捐廉以爲之倡其爲浙省軍民計者實已無微不至然爲數無多不過暫時敷衍轉詢奏調各軍齊至何以舖之請援照湖北減成米捐辦理湖南江西業經請發執照應自奉

旨允行之日爲始由兩省藩司查照減成新案填給皖南各

屬一體勸辦廣東亦委員前往照章收捐採購洋礮火藥以爲配駕兵船之用此外如有非浙籍而情願捐輸者聽從其便

上俞之於是就委王加敏勸捐湖南知府周開錫勸捐河口旋令開錫署溫處道以同知黃維誥署台州知府移署溫州知府並勸辦捐輸兼收鹽茶釐稅令同知李壽榛於衢城設牙釐總局暫辦官運甌鹽仍銷廣信饒州等處並收茶稅變通牙帖成案紳民一律准領委前按察使段光清勸辦上海捐輸二年正月二十七日附奏言臣軍餉銀軍火本省無從籌措支絀情形久已仰邀

平浙紀略

卷十四

五

聖鑒現因復地漸廣需兵愈多臣軍添募及按察使劉典所募新勇合計四千餘人轉餉到齊臺庫早空無以爲計此外尚須添造礮船僱募水師亦因經費無出暫未興辦而現在各軍之餉積欠已九箇月忍飢力戰雖未遽至譁潰而兵增餉絕大局堪虞計各省奉

旨協撥之餉自上年正月起至十二月止廣東每月十萬兩除抵撥蔣益澧一軍行資十二萬兩僅收過釐餉十萬兩尚欠一百零八萬兩福建自上年正月解過五萬兩以後每月三萬兩僅收過十九萬兩尚欠十七萬兩湖北每月一萬兩僅收過三萬三千四百兩尚欠九萬九

千六百兩除湖南江西撫臣於臣軍餉事最肯關心解
款撥項未經截算外其湖北等省積欠如此之鉅在各
省或以動撥頻仍不無爲難之處然以浙省較之緩急
懸殊相應籲懇

聖恩飭下廣東福建湖北將軍督撫迅速籌解大批以資接
濟如再遲延卽將各省布政使從嚴參處其湖南江西
兩省亦請

諭令以後仍須源源接濟俾得拯此飢軍二月二十五日奏
言臣令段光清赴滬勸諭甯紹等處紳商共捐銀二十
餘萬兩除已捐未繳及解過甯波洋銀六萬九千圓外

平浙紀略

卷十四

六

復親解到臣軍銀六萬兩當此軍餉乏絕之際得此一
款暫資敷衍軍心稍固臣已飭該員總辦浙江捐輸兼
理上海鹽茶絲捐事務以觀後效又紹興克復浙東肅
清應設立鹽茶專局抽收釐稅請以試用道葉熊辦理
熊卒以知府王慶勳顧菊生代之並令許瑤光兼籌辦
捐輸甯波則委甯紹台道史致諤督率同知汪元祥知
縣臧均之等辦理委前溫州知府王景澄勸辦江西吉
瑞袁臨等處米捐前後亦收銀十一萬餘兩並採辦米
二萬石硝二萬觔解交廣信糧臺六月初十日奏言臣
入浙以來因本省徵捐俱窮餉需奇絀是以奏於江西

廣信設立後路糧臺轉輸外省協濟餉需以資接濟今幸浙東一律肅清軍數日增師行日遠非由本省設立糧臺無以供軍實而速戎機擬卽於衢州府城設立閩浙總糧臺總司各軍支應請以代辦布政使署杭嘉湖道蘇式敬前奏調之湖南道員王加敏總司其事其浦城糧臺相距太遠應卽改爲轉運局專司閩省運浙餉需仍委前辦糧臺福建道員前署建甯知府汪達專司其事七月十四日奏言甯紹中外防軍月需餉銀六七萬兩臣所部浙閩粵各軍月需餉銀三十萬兩而各省協餉報解寥寥前由曾國藩撥歸臣軍江西河口景德

平浙紀略

卷十四

七

樂平婺源等處釐金一欸業經曾國藩咨開於本年六月初一日起仍撥還江皖臣處頓失此欸已覺拮据其廣東釐金一欸本係專濟皖浙軍營上年及本年春閒尙每月撥解二萬兩數月以來未據報解閩海關協餉欠解十餘萬兩兵增餉缺較前倍形支絀而一切軍火米糧近來俱由甯波採辦請將洋稅一欸從緩起解泊省垣旣復移設牙釐總局於杭城並擇各郡縣衝要市鎮分設釐卡令知府高卿培試行票鹽卿培旋擢浙江運使仍督辦牙釐總局當大亂之後更章之初浙東徽州課釐日有起色旋因賊竄閩疆派撥重兵馳援餉事

復急三年十月十四日奏言浙省自經兵燹彫敝萬分
新復地方不獨錢糧無可徵收且須另籌賑撫經費臣
軍餉需截至本年二月底止積欠或七八箇月至九十
箇月不等至今未能清釐新餉又欠兩月茲幸全境肅
清擬將各勇丁陸續裁撤爲節省之計而裁撤一營總
需銀二三萬兩計自八月以來新舊共撤四十餘營需
餉甚鉅尙有數營應撤以餉項不敷未能卽遣本省軍
需已形支絀復加以援江援閩各營餉項俱由浙省支
應尤覺竭蹶萬分值此庫藏空虛本省欠餉尙難籌給
臣由所有應解甘餉懇請暫免協撥至廣東前奉

平浙紀略

卷十四

八

旨由粵海關月撥解浙江餉十萬兩旋經曾國藩奏請開辦
廣東釐金凡釐務應得之餉先解浙江軍營次解安徽
軍營其廣東協浙月餉十萬兩卽在釐金項下抵除仰

蒙

恩諭允准特簡副都御史晏端書馳赴廣東督辦分批撥解
皖浙軍營在案臣查廣東協浙之餉自元年正月奉

旨之日起截至本年八月底止連閏共計三十箇月應協浙

餉三百三十萬兩道員義泰於同治元年領解廣東協
餉銀五萬五千兩又官捐銀五千兩除短平色實共收
銀五萬一千五百四十七兩六錢一分係前撫臣王有

齡飭赴廣東催提應歸從前欠餉結算臣接任後僅收廣東撥給蔣益澧行資銀六萬兩又採辦洋鎗洋藥銀一千兩又前後十二批共解釐餉銀二十四萬兩臣因曾國藩軍營需餉甚亟又由釐餉內分撥二萬兩解赴金陵計浙省共收粵餉二十八萬一千兩其釐金項下實僅收二十二萬兩曾國藩前奏至八月底止共收廣東釐餉一百二十萬是臣軍所得不過十成之二現在浙省軍務肅清所有前項協餉自應停止蓋籌餉之難如此當金陵告捷之日卽奉

旨同治三年六月以前各處辦理軍務未經報銷之案准將

平浙紀略

卷十四

九

收支欸目總數分年分起開具簡明清單奏明存案免其造冊報銷至四年閏五月省城設局辦理所有大營軍餉收支同知黎錦翰實綜核之布政使蔣益澧按察使楊昌濬詳言查咸豐十一年十二月楚軍各營入浙於同治元年正月十七日起開支薪糧湘軍各營於同治元年四月分起開支薪糧所有軍需其時全浙糜爛幾盡本省萬無可籌多賴外省接濟而外省亦各有軍務又道路多阻批解不前以致浙省軍需絀短萬狀積欠甚多前兼署撫憲左設法籌濟奏開米捐遴派委員分地勸辦並採買米鹽茶筴轉輸接濟雖薪糧積欠仍

多而本司等躬在行閒目覩艱難時以開諭眾軍各知
感奮全省以次克復遴委州縣籌給錢米招徠流亾商
賈漸集因整頓鹽課牙釐規復甯關稅務復體察始終
保全及最先收復地方或動碾倉穀或酌量啟徵及提
查咸豐十一年征存未解銀欸並聲明大義剴勸捐輸
兼籌併計輾轉補苴至支放各欸薪糧爲大悉照楚軍
定章核實支給逐月皆有欠欸積壓甚鉅次則招募資
遣整裝川費又次則採辦製造軍火器械及轉運各經
費購買並仿造洋鎗礮洋藥火帽各價值而浙省襟帶
江湖水師礮船最關緊要設廠趕造費亦不貲皆以餉

項支絀核實急需方准支發仍力求撙節而其中製造
採辦兩項亦多借挪挂欠又弁兵亾傷賞項亦查照楚
軍定章分別支給其完善各標營與滿綠各營續奉

旨簡放大員及陸續補署各員弁奉文收伍各勇丁分別額
支防剿廉俸薪糧等項隨營差遣文武員弁書識夫役
並投誠隨剿各營所有一切支欸均不容稍有冒濫而
亦必隨時照章放給以資口食業已竭蹶日滋又凡克
復一城卽須遴委正佐各員前往署理撫綏彈壓難使
枵腹從事亦須酌給半廉以爲辦公經費其地方例支
各項如元年春季克復者夏季卽應酌量撥給以免曠

誤或新復地方鄰近賊烽尚多伏莽大軍進剿他城不能分兵駐紮復須酌募壯勇以資防守各屬驛站均已被燬其時各軍分道攻剿文報不容稽遲必須趕緊補設並照例分設腰站以資接遞而撫卹難民掩埋暴骨尤不可緩雖餉項匱竭異常亦必查照例案酌量緩急分別籌辦統計大營軍需悉心釐剔皆照實收實放之數開列自咸豐十一年十二月楚軍入浙之日起截至同治三年六月止其用兵兩年有餘計收各省協餉銀二百九十七萬八千一百五十四兩零咸豐十一年同治元二兩年地丁屯餉正耗銀四十七萬一千九百六

十一兩零又咸豐十一年至同治三年漕項正耗銀六萬六千五百三十四兩零各年契稅襍稅學租存留弧建及溫處等府屬芽茶鄉飲歲貢旗扁等款銀六千六百六十六兩零藩庫撥濟軍餉銀三十八萬兩鹽課銀九萬一百四十九兩零甯紹關撥解銀四十二萬三千八百二十八兩零本省米捐銀七十三萬五千三百七十三兩零本省捐輸銀七十一萬八千四百五十八兩零江北上海捐輸銀二十萬八千八百二十五兩零本外省各釐捐銀一百三十九萬九千九百七十八兩零牙帖捐項銀九萬九千五百六十九兩零各營兵勇

截曠銀三萬八千七百十七兩零採買米穀茶筴變價
贏餘銀四萬四千七十二兩支放製造採辦各欸平餘
銀九千九十一兩零甯紹紳捐代賠前護關道段光清
海關短征稅銀四萬八千四百七十五兩前閩浙總督
耆發撫卹銀一千兩奉

旨查抄革員家資銀八千一百八十三兩零咸豐十一年同
治二三年南米五萬三千八百二十六石五斗九升九
合八勺各屬倉穀碾米七千一百六十四石九斗九升
三合五勺江西等處撥解捐米五千三石八升採辦兵
米除扣價外贏餘暨出厰米一萬九千七百五十三石

平浙紀略

卷十四

五

二斗七升二合採辦出厰穀五千七百十四石二斗三
升共收銀七百七十二萬九千三十八兩二錢五分三
釐零米穀九萬一千四百六十二石一斗五升五合三
勺支楚湘暨閩粵各軍兵勇口糧銀五百八十三萬三
百十三兩零滿綠營額支員弁兵丁廉糧馬乾各項銀
七萬八千四百六十二兩零帶兵大員補支停廉銀六
千七百十七兩零隨營文武員弁薪水書役薪工飯食
紙張等項銀四萬九千四百七十七兩零招募各營勇
夫安家整裝沿途口食川資銀十五萬一千四百五十
七兩零隨營攻勦投誠勇丁鹽糧及裁撤資遣各勇川

資銀二十一萬八千二百五十四兩零陣亡故傷各員
弁勇丁卹賞銀三十六萬五千七百三十八兩零製造
仿造軍火及製造一切器械帳房各項銀二十萬二千
一百九十五兩零興造戰船並各項運船僱用渡船等
費銀三萬三千七百六十一兩零採辦馬匹硝磺銅鐵
藥材油燭紙張等項銀八萬八千三百十八兩零運
解軍火軍米軍裝餉鞘木料及押運員弁水腳夫價等
項銀十九萬三千二百六十六兩零通省官員并衛所
各員廉銀十二萬六千五百二十四兩零地方例支各
欸及零祭昭忠祠祭祀囚糧不敷等項銀五萬八千一

百八十九兩零各屬設立腰站銀四萬一百九十六兩
零隨營工匠及糧臺各局護勇長夫口糧銀一萬一千
八十九兩零撫卹各項銀十七萬二千九百十六兩零
同治二年各大員衙門書吏心紅紙張銀八百三十兩
零支軍需兵米及團練撫卹等米八萬二千八百九十
九石零種籽穀五千七百十四石零收支相抵外存銀
一千三百三十兩零存米二千八百四十八石零尚欠
發各軍薪糧銀八萬六千七百一十一兩零傷賞銀八千
七百四十四兩零其有不經大營收支者作爲第二起
報銷詳云咸豐十年省垣失守文卷盡燬惟十一年以

後衢局文卷尙全應卽以十一年正月爲始溫處設防自是年八月起甯郡設防自同治元年四月起截至三年六月共收支銀二百五十九萬五千五百一兩米五千一百八十七石零其賊遺米穀鹽變價充作善後經費一欸事見第十三卷大軍之初入浙也強寇堅城所在林立匪唯兵單亦患餉絀幾幾乎師行千里士不宿飽矣左公殫慮圖維擇人任使每語之云能爲吾軍籌餉卽與戰功無異苟有成效奏獎隨之故人皆樂盡心力仰賴

廟算周詳明見萬里之外凡有陳請靡不曲荷

平浙紀略

卷十四

古

允從鄰省協餉兩江福建各五六十萬江西湖南各二三十萬並無負

朝廷申命未及三載全浙蕩平綜核軍需不過七百餘萬而大營兵餉尙祇十分之八可不謂撙節之至者乎自來軍需支絀或多襟欸茲獨實事求是未嘗濫費

國家鉤金斗粟蓋由大帥廉明而司其事者亦克精心斂幹約已奉公故能盡絕浮冒侵剋之弊昔孔子論政曰足食足兵關中餽餉河內供軍史策皆深美之是以武侯糧盡引還祖逖無仗而弱成敗利鈍不外乎此備誌其事於編末以見籌餉之艱用餉之節實爲軍事所倚賴

云

平浙紀略

卷十四

五



平浙紀略卷十四

咸豐十一年冬奉

命督辦軍務巡撫左公率大軍入浙至同治三年八月全浙告平凡用兵兩載有奇而其初之失之也亦非一朝一夕之故浙省負山阻海錯壤閩吳近迤皖南遠控江右屬承平日久休養生息魚鹽饒沃人物滋豐財賦之利亞於江南自粵賊颺起建瓴五嶺之裔長驅入湘圍長沙不下於是浮洞庭夷武昌破九江安慶以踞乎金陵白馬青犢之眾實繁有徒乃逞其跳梁北拔揚州東守鎮江以爲固豕突池太之屬以蹂躪皖南江西而浙之

平浙紀略

卷十五

一

調兵籌餉遂無晏日矣始浙中不知兵遙恃金陵大軍爲援歲供餉銀七十二萬上海軍月四萬未幾上海平而賊氛延徽甯閩及滄安警歲數至當事輒少發兵扼威坪昱嶺關千秋關各隘懾以虛聲時復乞援於金陵賊非大股亦未敢決深入方黃公宗漢撫浙時議者倡言抽收釐金不果行而是其兼轄皖南之說後何巡撫乃疏請皖南道得奏事並設皖南鎮如臺灣鎮道之例將弁兵勇胥由浙定餉糈軍火胥由浙濟倚之爲屏蔽而金陵大營亦視浙爲餉源猛將勁兵絡繹調赴甯國月餉至十餘萬前後統帥惟提督鄧紹良任最久咸豐

六年力克甯國城因駐師焉旋丁母憂不聽去紹良宿將前守桂林長沙功最著轉戰數省賊輒披靡自入皖南牽制於浙卒以餉絀兵單未能大張撻伐賫志以終先是五年春賊由祁門以竄徽防統領浙軍之福建汀漳龍道徐榮禦之於漁亭戰敗陣亡賊遂連陷徽州歙休甯婺源四城浙撫令金華知府石景芬等率兵會民團收復之及六年春賊復由浮梁樂平祁門竄徽浙防昱嶺及威坪賊知我有備又由太平涇縣徑犯甯國二月二十八日陷之並竄廣德建平賊騎直薄紅林橋且入浙境賴總兵秦如虎適至擊之而退而甯國府城久

爲賊踞鄧紹良旣授浙江提督乃統領各軍萬餘敗賊於東溪橋復潛師取七里墩遂薄城下圍攻半載餘始得克復當是時李公續寶戰死三河蘇撫吉爾杭阿公戰死高資金陵大營旋潰向公榮卒於丹陽蘇常大警而甯國旣陷浙防尤岌岌微紹良幾殆其後參將師長鑣知府畢大鈺都司徐勇皆戰死婺源徽防且無歲不警矣江西之袁瑞撫建前後告陷廣信亦屢失賊常往來常山玉山之間自是衢防始重調貴州安義鎮總兵饒廷選鎮衢州廷選在閩嘗平小刀會恃部將畢定邦賴高翔健鬪有功實無將略六年八月率軍六千餘往

援廣信不立一營亦得畢賴二將力戰解圍廷選獲晉
勇號八年春賊僞翼王石達開貳於金陵賊首欲自據
一方由江西河口鉛山廣豐繞竄江山以圍衢州廷選
敗於大南橋常玉防兵退保郡城金衢嚴道繆梓率數
百人擊賊城下大破之遂與衢州知府馬椿齡西安知
縣李甫田及廷選登陴固守甫田者李文襄之七世孫
也鎮道故咀晤防務一柄於道聞警數日守具悉備楊
國正瞿先仲兩將隸麾下所部並能戰民倚賴之西安
將軍福興由廣信奉

命來援軍既至索犒洵洵出戰而勝仍閉門按甲請再戰不

平浙紀略

卷十五

三

允旋奉

廷旨切責愠甚遂還江西同知李元度亦由河口入浙其將

彭定童梅華郭世源彭斯舉等軍於屏風關水田遙爲

衢州聲援並隱扼賊回竄江西之路賊西陷常山開化

南陷遂昌松陽以三月二十七日入處州與溫州僅隔

一江夕烽相聞知府王景澄集溫郡兵屯青田以上防

賊順流下竄厚集民團與官軍犄角並分委員紳管帶

兵練於永嘉之上下河鄉西溪柘溪瑞安之大羅山大

巒嶺樂清之桐嶺平陽之古鰲頭泰順之百丈口等處

水陸要隘嚴密防守又於溫溪小荆等處建設浮橋爲

水師礮臺就兩岸山險爲土山礮臺以固甌江之衝巡撫晏公端書檄溫處道俞樹風溫州鎮葉炳忠率兵剿賊而令景澄辦理防堵兼支糧餉金陵大營先後遣總兵明安泰李定太周天培督辦徽防副都御史張公芾遣總兵周天受各來援浙明安泰所部仁勇二千最無紀律軍中多婦人乘馬招搖過市民皆怪之浙撫令進攻處州由蘭谿金華入縉雲沿途擄掠至桃花嶺下之鉛錫場鄉團知其可侮值夜雨大呼賊至軍果潰卽奪輜重並拾其棄械而戕之死者過半時周天受適由金華率親兵數百覘賊踵明安泰之後亦喪其精銳而還

明安泰僅免遂不能軍俄撤歸自是民團始輕官軍生心掠殺矣天受退守金華城所部三千餘人佔住民房復因買牛不給價兵與團鬪殺傷數十人民心滋不悅又令周天培率所部出諸暨陸路進防永康乃天培由錢塘江乘舟至蘭谿檄之不顧幸賊以全力注衢城俱未遑深入時衢防各兵二萬有奇金陵及徽甯兩防徵調踵至不相統制於是晏巡撫奏以周天受督辦金處而請張公芾移駐嚴州督辦衢嚴未至會賊之旁竄壽昌者爲李定太所敗而衢州城守九十一日數破賊賊掘地道五皆不成食盡力疲解圍宵遁天受遣吳再升

等尾之遂連復武義永康縉雲宣平而溫州鎮道及陳
開選瞿先仲等亦於六月十五日克復處州賊由松陽
龍泉竄入閩境署松陽知縣張士超死之晏巡撫檄總
兵饒廷選副將張騰蛟援閩又令副將陶茂森韓廷桂
出江山分兵出龍泉援浦城而全浙已肅清矣浙警蹶
聞中外震駭援師大集餉不足用鹽運使楊裕深議減
糶各屬常平倉穀又疏請截留漕米十九萬石變價充

餉

朝廷曲從之密令胡公興仁來浙訶事俄授巡撫頗以皖南

糜餉爲慮始議減之是冬賊圍灣沚戴文英鄧紹良均

平浙紀略

卷十五

五

力戰死金陵遣總兵傅振邦擊賊皖南名將也署杭州

知府何紹祺亟言於巡撫滋欲任之而振邦懲紹良前

轍堅辭乃以提督鄭魁士代魁士治軍嚴厲驟繩其下

皆怨之又負氣多所陵忽久之不能和當事劾之則稱

疾棄軍獨率親兵赴東壩而提督江長貴周天受皆隸

徽防號敢戰張公芾之所獎拔也天受素謹事芾且新

有功於浙幕中多才文檄斐然可觀遂以代將甯國而

仍秉節制於新安內不平浙餉又屢乞天受未能恩威

迭用撫馭饑軍幾至譁潰識者固已憂之歲己未十月

江皖就浙江貢院舉行鄉試諸生及媼媪僕從由皖南

來者眾且盈萬關隘莫能詰賊之南下也固心豔蘇杭
金帛子女未嘗一日忘惟久怵浙中虛聲又不諳路徑
未敢徑犯會逢是役其渠魁乘便入偵備知虛實其時
巡撫羅公遵殿甫蒞任甯防告警石埭踞賊竄入糗子
店藍山嶺副將石玉龍游擊申明照守備鄭國泰等陣
亾周天受以黃池兵退飛書請援羅公知其不足禦寇
而鄭魁士軍於高渚乃奏請與甯防軍爲犄角又函商
江督以徽防兼總甯防議未定值江南軍克九洲洲金
陵賊窘甚僞忠王李秀成僞侍王李世賢及吳廷彩陳
炳文譚孝先陳坤書李尙揚諸賊由六合渡江集蕪湖

平浙紀略

卷十五

六

謀擾浙以分官軍之力而紓金陵之圍甫度歲卽率黨
由南陵疾趨十年正月周天受遣二將往禦勢鈞弗相
下兵又少不戰而潰賊遂連陷涇太平旌德甯國四縣
天受不能救二月初三日廣德州又陷浙省門戶盡失
初八日賊由東亭湖陷安吉十三日由泗安陷長興時
惟有李定太一軍二千餘人在杭倚之甚重警初聞或
謂宜調其軍徑出獨松關分扼泗安東亭湖兩路並屯
兵百丈關以固邊圉而軍已由水程赴援待船一日夜
又留湖州一宿進援泗安改援安吉皆不及敗於梅溪
退守湖州十五日賊進攻湖州直薄青銅橋守軍三百

潰走賊從之定太與紳士趙景賢湖州知府瑞春歸安知縣廖宗元等亟登陴禦賊礮及青銅門頗傷士卒會總兵曾秉忠以長龍礮船六十艘至自江蘇銜尾鳴鼓軍容甚壯急擊賊走之謀稱賊沿太湖趨夾浦惟宗元深以省城爲憂十七夜賊從山徑陷武康十八日走狗葬夜焚良渚聞者尙以爲土匪也十九日黎明賊至武林門已入十數騎人猶未覺統帶寶勝勇候選道陳炳元登城望知其爲賊始傳令閉城擾攘開賊之闢入者竟不可蹤跡云蓋賊稔知是日爲觀世音大士誕辰大吏必至天竺欲邀戕之湖上乘勢搶城而未知故事皆

以十八日預祝也遂分圍武林錢塘湧金清波等門城中除滿營外僅有撫標各營兵二千餘署鹽運使繆梓傑勇二百協防局團勇三百都司姚發科福勝勇五百城外則有江南大營新募江西勇二千人過境未去其按察使段光清所部親兵四百皆先出守餘杭之獨松關爲賊所格二十日光清由獨松關回援且戰且行滿營應之乃得入城旋調甯紹台道仲孫懋興勇二百助守二十二日賊登玉皇山段光清繆梓各出隊民團隨之見賊驚潰官軍亦不戰而歸二十五日賊於湖上立十餘營光清率親兵及江西勇三路出戰皆敗初羅公

知浙軍不足恃奏調道員蕭翰慶由湖北率訓字營赴浙過徽州值太平旌德不守張公芾令助剿克復三城又留其副韋志俊一軍翰慶馳躡賊後至湖州虹星橋與賊戰以兵單敗死芾遣革職提督米輿朝由徽州來援頓富陽不進縱兵掠爲民團所圍傷數百時賊踞慢頭等山爲壘取淨慈寺羅漢像環壘執旂城上望以爲賊發礮多中之賊居高瞰城中礮子雨落至是守陴者皆怯矣始被圍巡撫飛章告急並乞師於金陵大營隨遣提督張玉良赴援二十二日副將向奎率前鋒千五百人至平望取道海甯赴杭屯清泰門外李定太由

湖州率軍來援均與賊隔絕二十四日張玉良率所部二千餘人至蘇州吳中大府意謂援杭且不及欲令向奎駐嘉興張玉良駐湖州陰固蘇省門戶以故玉良過常蘇皆飲之酒俾闕城置守而後行杭州城中段光清主戰繆梓主堅守望援師眼穿賊於清波門外西竺庵掘地道日夜擊金鼓亂其聲丁憂紹興府照磨陳奉彝請開城內地道以防之繆梓以爲然連日雨甚工不得就二十七日卯刻雨止地雷忽發城塌數丈賊湧入梓在城上禦賊死之城陷巡撫羅公遵殿署布政使王友

瑞杭嘉湖道葉堃甯紹台道仲孫懋署杭州知府馬昂

霄署仁和知縣李福謙皆死之候選道陳炳元亦巷戰陣亾浙屢警旋平士民習而安之此次賊來剽疾遷避者不及十之一二賊圍城鋪戶多集丁壯助守及破猶力鬪傷賊頗多是夜賊仍退出城二十八日賊眾盡入恣行屠戮死者填路人馬不能行將軍瑞昌與都統來存佐領傑純率旗兵力守滿城婦女亦撚矛刺賊賊憤屢攻死傷枕藉終不能克張玉良於三十日晚行次湖州三月朔日乘小舟以六百人進抵武林頭知省城已失初二日全軍抵武林門城外無賊營故莫之阻是夜五鼓令勇士由艮山門民屋上置梯攀城大呼先登斬

其守賊十八賊見張字大旗驟驚愕謂副帥張國樑實來又以滿城未下在其肘腋所過城邑均未置守旣飽掠恐官軍大至合圍斷歸路且揣知金陵大營空虛謀還襲之卽於初三日棄城由湧金清波門走平審出獨松關破孝豐竄回甯國縣廣德州一帶金陵續遣總兵熊天喜來援由安吉長興進敗賊於廣德克之並復建平此次賊來犯浙者不及萬人原爲圍魏救趙之計初不意杭城空虛而破之之易也卒以人寡勢孤不守而去浙境乃得復清賊旣遁還糾合江北死黨由句容秣陵關回撲金陵大營甚急城賊突出內外夾攻亟調回

援浙各軍未至而大營已潰賊遂由丹陽常州無錫進陷蘇州布政使王公有齡先已授浙江巡撫於三月赴任又假紳士趙景賢令箭督守湖州向倚金陵大營若長城故但嚴湖州一面遮皖南而未籌備嘉興及大營潰張副帥戰死丹陽常蘇並破浙中大震張玉良師潰蘇州乘腳槳船以親兵數人一日夜駛至杭其他將卒絡繹奔潰殆二萬人浙西鼎沸巡撫亟遣人持令箭止之俾駐嘉興多有越過杭城四走及散入江西者已而賊李世賢由金壇回撲提督江長貴軍潰平望賊進偪嘉興四月二十六日城陷府教授蔡兆輅及訓導張詠

死之玉良收集潰卒萬二千人以圖嘉興於是爲之籌糧餉製器械百計補苴經費夫細則取挹於甯紹而十倍紹捐之議起十倍者謂視初捐兵餉而十其數也玉良六月出師盛具舟楫而行浙旣無重兵勁旅專任客將士卒悉潰敗之餘驕囂不可復制遠近騷然惟湖州團練多兵勇少主強客弱節制整肅守具嚴備省城亦浚濠脩隍爲固守之計當是時民團四起金華蘭谿城鄉團眾至十餘萬悍而無律藉殺逃勇爲名專害行旅取資囊死者常盈舟雖持令箭公文者不得免焉溫台民風素勁團且勇而遷地弗良集台勇爲軍輒憤事潰

掠爲各處民團所殺者殆千餘人杭屬惟餘杭富陽有團前此賊竄出省道經餘杭或誤走富陽界兩縣民頗邀之獲利無算賊銜恨至深是時僞英王陳玉成以十萬眾由皖南寇浙破餘杭杭州戒嚴賊旋退去甯國府已於上年十月失陷全軍俱覆周天受戰死而杭州西北恃湖州爲屏蔽賊慮夾擊不敢逼惟北一面當賊衝張玉良旣至嘉興軍於三塔灣白衣庵肉薄攻城七月十七日轟破南門堞口城賊半逃我軍阻水不能入二十四日潮勇通賊陣亂各營官畫船繡幕攜眷舟居者先奔河狹舟爭水師亦亂軍潰至石門知縣李宗謨請

駐守玉良佯諾夜半走天明賊至宗謨死之而嘉善於十二日平湖於十五日桐鄉於二十六日次第失陷賊得石門卽棄去越日復之旋爲賊據毀城爲壘平湖亦越日復之八月初五日再失又復之至十一年三月初八日鎗船通賊導之破海鹽初九日破乍浦副都統錫齡阿死之復破平湖於是嘉興惟存澈浦一城浙西與江蘇皆瀕海澤國地犬牙相錯兵與餉交相籌借有輔車唇齒之勢蘇州陷後署巡撫薛煥駐上海縣城平湖三泖與滬通十年七月至十一年三月嘉郡旣失正道

雖梗而鹽平乍澈尙存浙中軍書可由海甯繞之以達

上海其守鹽平者有革職提督米興朝副將黃金友革職副將張威邦水師提督曾秉忠及其弟守忠而乍浦滿營亦苦戰卻敵故嘉興由漢塘一路不能竟撲平湖至是土匪導從旁襲黃金友力戰陣亡而杭滬之路斷矣杭州將軍瑞昌奉

旨總統江南諸軍不能離滿城督戰始議攻嘉興不果賊僞聽王陳炳文僞榮王廖發受踞嘉大造僞府折祠廟梁柱以供材開嘉善千竄以供陶攪蘇州香山梓匠以供役盤龍翔鳳重矩疊規前後七重外列僞朝房中有崇陛繞以禁城七邑鄉官各承修一重迄至克復之日工

平浙紀略

卷十五

七

尙未竟費用皆取於民間而爲之剝削者鎗船博徒居多嘉郡水國饒沃土秀文而民習好賭博無賴者修造兩頭尖小輕船上架鳥鎗始護私鹽繼護賭廠句通胥吏作奸犯科無所不至其風延及湖州顛預官長每收漕時恐鄉民滋事或轉雇之以資彈壓而鎗船益無忌憚其廉幹者欲加懲創令尙未行胥吏通風輒先颺去持之過急又或爲所窘辱自道光之末養癰不治以至賊擾江南愈務姑息而勢愈熾及郡城淪陷亦有受招入伍願立效贖愆者如石門一城曾招鎗船克復是也第陰鷲凶頑性多難革旣爲上著誰富誰貧歷歷可數

而又熟識支河汊港故鹽平仁浦及海甯四城之破皆其所爲迄今嘉興士民猶切齒言之其禍烈矣夫禦外寇者先清土匪當於平時豫謀且可乘用武之勢翦除之若強寇在門坐視其因風生燄豈有及哉

平浙紀略

卷十五

三

平浙紀略卷十六

咸豐十年春杭州旣失旋復未幾嘉興告陷賊雖據我門庭而杭湖守險難攻浙東及金衢列郡固皆完善也是秋徽州復失賊由淳安竄嚴州副將封九貴死之九月初七日城遂陷復分股竄富陽總兵劉季三副將劉芳貴皆力戰而死二劉俱勇將而芳貴寶慶人也尤驍健至是陣亡富陽遂不守浙撫王公設奠於仙林寺哭之哀時張玉良收嘉興潰卒進攻嚴州復之十月賊由富陽餘杭兩路分撲杭州城守數日出擊獲勝始得解圍而自後餘杭富陽桐廬各城旋復旋失賊幾無後顧

平浙紀略

卷十六

一

慮則由婺源出入江皖履若通衢而江西饒信之防亦棘十一年春賊僞忠王李秀成僞侍王李世賢先後竄江西擾及撫建袁臨其先恪靖伯左公方以四品京堂襄辦兩江軍務軍於景德鎮屢破賊於廣饒之間江督曾公倚以爲重至是大破李世賢於樂平又連破之婺源清華街及柳家灣橫山等處賊喪魄東走仍由婺源竄廣信玉山三月十五日陷常山并糾范汝增黃成忠練業坤三僞王由玉山入江山境守兵皆潰范汝增等由湖口村繞犯處州李世賢率大股賊拂衢州城而過十七日由靈山撲陷龍游知縣龍森死之並陷湯溪以

犯金華賊之在江西也不踞守城池惟日掠人益其眾
識者知必回竄或謂宜募湘勇數萬自成一軍且患省
城穀少思有以聚之並議於通江門外夾築土城屬江
便扼守以護運道事皆未及行時張玉良屯蘭谿金華
知府王桐聞警乞師十八日玉良率親兵百人抵郡城
中團練謂自能守禦不需官軍力城西通濟橋跨大河
陸路舍此無由入議折之又不遂玉良閱城而返十九
日賊以六騎先至闔城皆潰李世賢乃率眾踞之浙東
大震巡撫王公延請諸將入宴問孰往禦各默不言處
州鎮總兵王文瑞江西援浙將也所部三千人食江西餉

巡撫待之素厚文瑞亦彬雅知禮義自請行五月朔日
次諸暨初諸暨東鄉有團首何文慶創蓮花教夥黨甚
眾陰謀不軌知縣許瑤光曾任諸暨得民心十年冬再
署縣事欲捕之而力未逮及是省中以文瑞兵少給何
文慶翎頂軍火器械并錢萬串檄令率團五千人受文
瑞節制從擊金華文慶擁眾數千居江東五日殺文軍
四人冀激而生變許瑤光曰此土匪也急擊可解若縱
之入城則殆矣遂出隊戰於東門大橋敗之追殺數十
人乃散文瑞率所部及游擊曾得勝貴順勇千人進駐
金華之孝順街又有在籍提督余萬清者詭請助勦領

火器數百藉斂錢三十萬串每村夜以竹竿然數燈照之而已張玉良軍在蘭谿蘭谿民團憤其平日之擄掠又以不救金而回蘭谿之旋因掠一火燄店相攻殺各傷斃二千餘人因拔營走沿江擄船而下賊由金華進陷蘭谿江路遂梗玉良旋率兵由嚴州進蘭谿欲報民團之仇下令肆殺老弱婦女無一得免並縱火焚其屋女埠上下七十里皆灰燼三衢被難士民舟居蘭谿下游者同時爲兵擄殺以千百計知府程兆綸擊楫往救亂兵戕其幕友血濺兆綸衣兆綸憤甚訴之玉良無一語亦不出一令乃赴省上訴王巡撫慨歎而已兆綸無

如何嘔血死於杭是役也漂尸如木柀蔽江而下可謂慘矣先是有參將王浮龍者帶奮武軍千人赴蘭谿防堵歸張玉良節制玉良分其軍爲三以三百守蘭城以三百守界址嶺而浮龍自領四百守小方嶺及蘭谿旣失玉良之兵先退浮龍腹背受敵仍鏖戰殺賊至五月初五日卒以眾寡不敵而死其時小方嶺居民未遑賴浮龍捍禦十數日得以從容奔避又其馭軍有法未嘗擾民故蘭谿民團與兵爲仇惟見奮武軍之腰牌號衣無不互相救護其感人之深如此浮龍直隸人武進士以戰功擢至甯海參將嘗守省城慶春門城樓夜不解

衣日不下城者半年巡撫王公異之令募勇千人卒以
血戰陣亡左公奏云其先未能專任而盡其長卒以分
兵而孤其勢孤忠偉績掩抑堪傷益痛惜之云浙撫令
米興朝吳再升各率眾二千餘爲文瑞後繼未至諸暨
而孝順街軍潰六月朔日義烏失守賊蹤突過查林蘇
溪諸暨教諭韓煜文率民團扼善坑嶺賊不得前旋棄
義烏去官軍畏暑不進七月米興朝吳再升曾得勝並
入義烏東陽土匪陳上達殺舉人吳榮誥爲亂米興朝
移軍剿之先是浦江告警都司劉嘉玉率衛勇千人營
於五麓嶺及蘭谿賊勢披猖文瑞進守浦江并令副將

劉長培固勝勇千四百人由諸暨況文榜川勇二千人
由小力埠抄山路繼之初四日賊大至五麓嶺守軍退
入縣城賊圍之文瑞絕書告急適饒廷選自蘭谿敗歸
遂令援浦先是紳士胡光墉結好於前皖南道李元度
請檄募安越軍八千人援浙會賊由萍鄉萬載竄擾醴
陵瀏陽等處湘撫雷元度禦之賊退道出江西又畱助
勦輾轉數月而浙事已裂新調浙江布政使林福祥由
弋陽募定武軍三千同知陳大力新湘勇一千知縣張
振新新寶勇二千先後抵衢時龍游雖無賊踞衢杭陸
路已梗城中兵勇數千多貸食民間新軍至者無所得

餉主客將勢如水火福祥自攜重賞或謂宜出以犒軍
並收兩軍張左右翼從龍游水陸俱進以攻蘭谿而衢
防出軍攻湯溪則賊勢分而下游之禍亦紓若但圖與
杭兵合并同入囊口失用武之利且兩敗福祥不能從
乃聽陳張兩軍自行旋以礮船載親兵輜重南岸列隊
並下僅乃得達遂會蘭谿軍張玉良饒廷選各營三面
攻城與賊相持月餘聞嚴州陷諸軍潰至義橋爭舟而
濟俄報總兵羅大春復嚴州眾心稍定七月十四日廷
選率眾六千援浦江以周璧閩潮勇五百爲前鋒潰於
鄭義門逾數日鹽運使莊煥文率所部千人及閩省道

員張啟煊繞道處州率雲霄勇二千來援廷選整隊同
進五日行八十里八月初二日及鄭義門又潰巡撫王
公憤甚致書於廷選略云省中庫無餉倉無米出陣之
兵不見一賊而潰新置鑼鼓帳篷盡棄度日如年度夜
比年更長咨查首先潰退之人廷選乃殺其不悅者二
人以解未幾紹興又急省中無兵可遣王公乃令副將
楊金榜率親兵振武軍千五百往守諸暨營於城南五
紋嶺饒莊潰軍營於城東金雞山及城西七岡嶺時軍
資盡棄亦不遑深溝高壘但築土牆三尺以葦箔蔽風
雨林福祥住城中日惟飲酒而已文瑞知無援於初四

日衝圍走桐廬山中浦江遂陷賊分路犯諸暨十三日
西南鄉團奮勇殺賊斬首四百級十四日西鄉團敗賊
於蒲團嶺南鄉團敗賊於豐江均約官軍會擊僅出城
列隊終不敢近賊二十一日賊知軍怯乃大至民團陣
亡二百餘會僞來王陸順德由浦江富陽山路出和尙
店渡臨浦以二十四日陷蕭山我方防南路而賊已抄
過北路裏官軍中閒眾益洶洶諸暨東達紹興北走杭
州是日楊金榜退回省城林饒兩軍出東門聲言援紹
過江東橋亦折而北歸留奇勝勇駐橋旋多散去何文
慶舉眾投賊二十五夜城中民盡走知縣許瑤光然燭

平浙紀略

卷十六

六

南城堞賊猶逡巡不敢逼二十六日巳刻四鄉火起始
有賊騎入城遇瑤光以長刀連劈之暈絕於地俄蘇爲
民扶出昇至楓橋以免蕭山諸暨并失而紹興危矣紹
之爲郡與杭州隔江相距百里而遙北濱海西北當錢
塘江諸暨楓溪之水由西南出臨浦義橋旋繞之其東
則曹娥江也惟正南一縵山脈與諸暨嵎相聯屬士秀
民樸風氣素柔自嘉興不守

廷命前漕運總督餘姚邵燦前副都御史會稽王履謙先後
爲團練大臣欲以紳助官以民助兵凡賊擾各省皆有
之不獨浙也顧羣然聳異相與奉以尊大燦知事不可

爲謝去履謙愿易欺有王梅溪者游幕江蘇二十餘年
王巡撫在蘇時嘗發其奸通檄各屬禁勿關聘乃歸越
銜之刺骨及撫浙以捐事頗賈怨又官紳鈞峙咨牘往
來各指摘文句謠詠漸興王梅溪從中構煽遂若仇讎
履謙不知兵漫無布置名爲全省團練實止山陰會稽
蕭山又惟郡城內有器械旂幟招水龍勇及坊巷游民
以實冊籍反欲專制浙東餉益市洋船鎗礮務自張而
實不足恃當金華初陷巡撫以歸安知縣廖宗元屢保
湖州有將才檄署紹興知府而調懷清署杭州王履謙
數貽書留清當事復緩宗元檄久不得之任又議令署

甯紹台道張景渠來脩守備以鹽運使莊煥文所部閩
勇守城履謙信羣言謂兵適擾民不如團練自爲守力
沮其議愈相咀晤浦江危急廖宗元始受事至則促脩
城垣令移附郭厝棺議設柵扼大道民皆以爲不便浙
省習用洋銀咸豐七年以來每圓重七錢三分值幾一
兩嗣經喪亂奸商益壟斷於舊號光板爛板輕板繡板
外復立大糙小糙淨光名目任意軒輊價相懸殊旦夕
之間亦有漲落把持盤剝民甚病之嘉滬路斷惟紹興
居甯杭之中益操利權宗元嚴禁之大拂商情積此數
者俱含怒未發九月二十六日內河礮船禦賊錢清而

挫退至昌安門外摘食河中菱角團民責其騷擾毆之
譁甚宗元出城彈壓民間聞賊前由臨浦入蕭山得礮
船始濟又以錢清之敗營官陷賊中遂誣水軍通賊宗
元意守城尙資礮船撫慰之而斥其妄語漸侵宗元謂
亦通賊毀其肩輿王履謙聞變往勸不止比入城觀聽
者益眾聞通賊語更相唱和奸民王淮三等五人嗾眾
毆宗元傷甚扶入署昏卧不可復出於是團民攬水勇
及宗元親兵數十人殺之履謙亦弗能禁宗元先請調
楚軍二千履謙不聽入城協守二十九日賊徧郡城團
練閩然盡散城陷知府廖宗元死之惟謝主事之黃頭

姚勇與賊巷戰於大善寺前護王履謙出走上虞賊又
至知縣胡堯戴死之履謙乃航海入閩賊遣人聘請山
陰峽山前戶部郎何惟俊惟俊從容作書戒賊無殺百
姓投繯死屬縣次第陷歿論者謂嘉湖甯紹根也餉源
所出也衢嚴節也所以通江皖也溫台處葉也邊圍之
外障也以形勢言之金華乃浙東之心而亦浙西所視
爲安危者也自十年四月嘉興不守湖州蔽賊比於睢
陽日不暇給及十一年三四月閒浙滬隔絕衢處被擾
金華告陷八月嚴州又失然猶恃甯紹接濟軍餉以東
道之通爲四達之漸至是紹興失而杭城孤危愈甚西

存一困守之湖州東留一彈丸之海甯則幾無節不斷
無根不掘無葉不翦矣諸將由東陽諸暨退回饒廷選
所部閩軍習不爲壘居城中供護林福祥出軍望江門
外賊至潰還楊金榜營於鰲頭山十月初二日賊從慶
春門繞至清泰門金榜率六成隊擊退欲以通江路也
西湖賊見金榜出戰從淨慈寺後撲襲其營金榜收隊
而營已失敗賊復回夾擊軍潰自剄不殊爲賊慘戕而
死僞聽王陳炳文於羅木營結五壘初五日張玉良至
自富陽文瑞況文榜踵至力攻羅木營破之兵疲甚暫
憩爲食饒廷選謂姑徐之城中無應者賊乘夜仍搶築

成壘遂合圍十門並於清波門外及鳳皇山夾木爲城
中實以土鑿穴安鎗礮日夜轟擊張玉良屢攻賊壘並
令江頭礮船夾擊弗克十九日玉良送客出營門還中
賊飛礮折右脛將士以船護送至聞家堰而卒城中奪
氣二十五日閩軍自請攻羅木營饒廷選阻之王公不
聽廷選乃令部下俟天明齊出放空鎗而回圍至十一
月初旬城中糧盡升米值銀一兩候補道胡元博主議
借捐民踴躍從命集錢十餘萬串而已無米可購飢民
哀號滿街市浮萍蕉葉草根樹皮皆盡折取新舊皮籠
爲食僵斃相望其後死者或割食先死者肉以延殘喘

將軍瑞公病甚乍浦副都統傑純屢欲出戰而杭州副都統關福堅持不發兵初九日有賊從望江門外來投誠林福祥信之給黃金二百兩及軍火號衣紅藍頂花翎約官軍四鼓出隊彼卽燒海潮寺賊營爲應至期如約往賊先發空鎗礮旋加彈多傷士卒追至城根適鳳山門空心礮臺火起城幾破副將曾得勝力戰城上賊始退是日武林錢塘清波門外各營皆投賊十三日有放出監犯徐姓通賊約期開城門事發斬之至是兵食亦盡碾義倉穀七千石并殺馬驢以餉王公與士卒均甘苦至以糠粃攪米煮粥對之流涕林福祥以下其家

平浙紀略

卷十六

十

人或日食蠟燭數枝軍士有搜取民家食物者土匪導之擄掠城中大亂巡撫自出禽斬數人勢稍定城之初圍也居民備粥飯擔送城上餉軍若需用木板蔴袋等物片紙下立卽輸送而是月杭州紳士胡光塘以白蠶殼船由甯波運米二萬石從黃道關入江十五日泊三卽廟守數日湖州紳士趙炳麟亦由上海以輪船運米至遇颶風返皆不得通時賊糧亦罄李秀成欲回蘇州度歲陳炳文詞知城中虛實不肯去延至二十八日守城軍已數日不食乃各潰散賊於巳刻由各門梯城入遂陷巡撫王公有齡學政張公錫庚處州鎮總兵文瑞

署布政使麟趾按察使甯曾綸糧道暹福道員胡元博
彭斯舉朱琦署仁和縣知縣吳保豐皆死之初彭斯舉
度地勢復議自望江門築甬道適福建新解礮至令斯
舉試放礮裂傷額幾殞議遂格吳人候選主事周騰虎
慷慨奇士王公撫浙招至杭州檄辦洞庭山團練而太
湖已爲賊踞則由山路閒關走廣信謁左公軍門備陳
杭州艱危狀旋從江督曾公於安慶請援皆不及城中
惟日望李元度安越軍來援先是李秀成於八月由江
西竄浙賊眾二十餘萬九月朔攻衢州數日不下乃解
圍東走以偪杭州寔至危急衢警漸平元度亦至因無

餉壁城外旬餘進攻龍游兩月不下接杭城告急帛書
亟商發衢防兵接攻龍游不應乃收軍赴援杭州既陷
城中官五六百無一得出居民六十餘萬半已餓死時
嚴寒被驅出城凍死江干及被擄殺而死者不可勝計
巡撫王公先令壯士持帛書遺摺并絕命詞縋城出由
海塘走黃道關交胡光墉轉達上海署蘇撫薛煥爲之
代奏其略言紹興失而杭州不守咎由紹紳團練大臣
王履謙臣死不瞑目云李秀成以禮殮巡撫學政及文
總兵題曰忠臣某官之柩交林福祥暨署杭巡道劉齊
昂送之上海旣至當事不臨奠而發視之貌皆如生王

公頸帛猶繫張公目忽動血淚迸落人皆異之十二月朔日滿城亦陷將軍瑞公縱火自焚副都統傑純力戰死之闔城皆殉初三日賊遂攻破海甯州而處州旋復旋失者再台州亦先失處州知府李希郊署台州知府龔振麟署台協副將奎成皆死之賊由嵎奉化兩路逼甯波卒不守惟湖州守堅至同治元年五月初三日始陷知府瑞春死之城中官吏無一從賊者擁趙景賢至蘇州日罵賊求死李秀成禮敬甚至欲釋之歸因而乞款爲他酋所阻至次年三月十八日賊譚紹光不能堪擊以洋鎗死之湖州自十年二月卽自爲戰守賊數大

平浙紀略

卷十六

三

舉圍攻出奇制勝無不負重創以去閒復平望廣德兼援杭州威名甚著及杭州再陷孤城獨存四圍千數百里皆賊日益危蹙時朝廷已授景賢福建糧道重惜其才

傳旨令棄城之任景賢衝圍可出顧不忍去元年二月猶敗賊七里亭賊知不可力攻遠合長圍絕其餉道城中十餘萬人憊甚至是千總熊得勝開門降賊乃得逞焉左公方攻衢州城東北賊壘聞報深爲惋惜當是時全浙淪胥惟衢溫兩郡城及定海石浦龍泉慶元泰順五廳縣僅存而衢州一城之外幾成焦土溫州前金錢會匪

入城城外復被賊擾左公疏中已備言之金錢會者咸豐八年金華人周兆榮以妖術教人喫菜於青田永嘉兩界山中投錢沸湯中焚符誦咒飲之刀棒不能傷謂之銅錢壯是時粵賊方陷處州村民懼招寇糾眾掩焚其巢兆榮流轉至平陽錢倉鎮易名榮與埠役趙啟相結啟故無賴自云中得金錢七當貴遂糾合奸民朱秀三謝公達繆元張元孔廣珍劉汝鳳等爲金錢會人給銅錢一文曰金錢義記紅帖一帖分八卦各數千人無少長皆稱弟兄又言陰受粵賊口號入會者無賊禍誘脅日眾明年延及瑞安生員潘英林景瀾鄭日芳奸

民黃孔標林福瑞黃梅宇等皆從之已而署平陽知縣翟維本以事召趙啟入城重犒之去益斂財置器械爲逋逃藪咸豐十一年春事稍露維本誤聽奸人議言之道府給牒改會爲練劫官同祭旗勢愈張瑞安孫氏方督治團練欲討會遂相仇六月劫林洋焚陳氏謝氏七月焚雷瀆溫氏團首陳安瀾等募台船水陸攻錢倉匪眾奔潰啟欲自盡其黨止之旣而知非官軍復聚眾攻殺溫氏數人焚孫氏義安堡屋並劫平陽城外富室二十八日匪首趙啟潘英蔡華等率眾二千餘揭竿持梃襲溫州城入自三角門先犯試院殺捐輸委員前麗水

縣典史許象賢次犯道署殺一人次犯府縣署各殺數人道府縣印俱失分黨焚南門民居大掠城中府縣以事先出溫州鎮總兵葉炳忠聞變及前禾嘉知縣高樑材各召勇入擊鎗斃數人匪卽驚潰奪小南門逸去九月初三日瑞安會黨出桐嶺焚婁橋民居明日復犯郡城勇目徐文久千總陳國泰逆擊走之生員張家珍率湖石團練及各村義民數千擊匪戰常勝及十月二十四日戰死次日匪遂由岫頭渡江薄焦石並引海盜船進攻瑞安知縣孫杰與紳團百計守禦連攻十日不克會閩省道員張啟煊由處州來援高樑材以廣艇入飛

雲江趙啟棄龍山潰竄鄉民咸紛其眉以助官軍沿河數十里截殺無算生縛五百人至城東皆破其腹而斬之十二月張啟煊軍至連戰皆捷生員孫詒穀戰死總兵秦如虎盡焚蕭家渡瀕江會匪巢穴嚴檄責獻爲首者趙啟竟逸去同治元年正月秦如虎入平陽張啟煊破金谷山復搜殺數百人貸其督從會匪平朱秀三潘英等皆就獲磔之惟周榮張元繆元謝秀球鄭日芳等十餘人倖脫趙啟逃至玉環二年二月爲守備鍾國泰所禽伏誅左公疏稱翟維本李明邦雖無通匪故縱等情而一意彌縫釀成巨案咎無可辭請從重發往新疆

蓋亦持平之論矣安越軍之援杭州也再得帛書亟進
欲道壽昌沿途阻賊卡弗能前聞杭州失守徬徨未決
進退衢防馳書迎之乃還議屯常山及衢州城外或遣
其總理營務知府陳奉彝書略云衢城有防兵無俟近
衛江西不供餉奚事常山而閩省爲衢防餉源江山爲
通閩咽喉不如屯江山顧餉道遙與衢城相應賊必不
敢略江山而攻衢州亦必不敢略衢州而攻江山卽常
山不守自全因而待大軍策之上者也元度聞之卽日
拔營駐江山留三衢一綫以爲左公進兵之路豈非天
哉浙奧區物產宏博地險足守也財力足富也項籍用

會稽戚繼光用金華義烏皆無敵於天下兵非不可戰
也馬服君之言曰譬兩鼠鬪穴中將勇者勝量錯論兵
事謂將不知兵以主予敵主不擇將以國予敵自浙聞
警設防首尾十載殫土竭廬以事人一借將金陵再借
將福建三借將徽州江西迄無解於十年二月之禍而
金陵亦因兵少備分而燬師卒乃收其潰將敗卒因循
不振以迄於亾前湖北巡撫胡文忠公疏云用兵數年
各省皆有得力之將數人以折衝禦侮於其間浙省之
有與否臣不得而知之是鄰封皆知借將之非也而且
官與紳仇官與官紳與紳亦仇民與軍仇民與民軍與

軍亦仇乖氣致戾莫之或救孟子曰天時不如地利地利不如人和不其然乎夫不有廢也何以有興論者謂草木之被翦伐而復萌芽必存其本根焉故賊圍長沙不下恢復東南之本也上海孤存一角恢復蘇省之本也衢州亦然第衢州雖存於十一年之固守恪靖伯之善援而實由八年先警以兵使官與將習捍禦而民利入城附郭牆屋盡燬而守益堅深所謂莫之爲而爲者歟語云前車之覆後車之鑒故詳述浙中喪敗所由附爲末卷其有因文連綴已見前卷中者則敘次從略直書其事亦治亂之著蔡得失之淵藪也死事數公大節凜然雖將略不長而見危授命律以與城存亡之義又何憾焉

平浙紀略

卷十六

十六



